

四庫全書

史部

欽定四庫全書

舊五代史卷六

宋門下侍郎參知政事監修國史薛居正等撰

梁書第六

太祖紀六

開平四年十月乙亥東京博王友文入覲召之也己卯  
以新修天驕院開宴落成內外並獻馬而魏博進絹四  
萬疋為駟價壬午以冬設禁軍幸興安鞠場召文武百

官宴幸開化大閱軍實十一月丁亥朔幸廣王第作樂  
辛卯宴文武四品以上于宣威殿庚戌幸左龍虎軍宴  
羣臣甲寅幸右龍虎軍宴羣臣戌戌詔曰自朔至今暴  
風未息諒惟不德致此咎徵皇天動威罔敢不懼宜徧  
命祈禱副朕意焉差官分往祠所止風己亥日南至帝  
被袞冕御朝元殿列細仗奏樂于庭羣臣稱賀帝略于  
伊水乙巳詔曰闕防者所以譏異服察異言也況天下  
未息兵民多姦改形易衣覘我戎事比者有謀皆以詐

敗而未嘗罪所過地叛將逃卒竊其妻孥而影附使者亦未嘗詰其所經今海內未同而緩法弛禁非所以息姦詐止奔亡也應在京諸司不得擅給公驗如有出外須執憑繇者其司門過所先須經中書門下點檢宜委宰臣趙光逢專判出給俾繇顯重冀絕姦源仍下兩京河陽及六軍諸衛御史臺各加鈐轄公私行李復不得帶挾家口向西其襄鄧郢延等道並同處分以寧國軍節度使王景仁充北面行營都招討使潞州副招討使

韓勅為副相州刺史李思安為先鋒使時鎮州王鏐定

州王處直叛結連晉人故遣將討之

五代會要十一月十四日司天奏月

飲不宜用兵時王景仁方總大軍北伐追之不及至五年正月二日果為後唐莊宗大敗于柏鄉

十二

月辛酉宴文武四品以上于宣威殿親閱禁軍命格鬪

于教馬亭己巳詔曰滑宋輝毫等州水滂敗傷人戶愁

嘆朕為民父母良用痛心其令本州分等級賑貸所在

長吏監臨周給務令存濟壬辰賑貸東郡畿內如宋滑

制

乾化元年正月丙戌朔日有蝕之帝素服避殿百官守司以恭天事明復而止制曰兩漢以來日蝕地震百官各上封事指陳得失蓋欲周知時病盡達物情用緝國章以奉天誠朕每思逆耳罔忌觸鱗將洽政經庶開言路况茲謫見當有咎徵其在列辟羣臣危言正諫極萬邦之利害致六合之殷昌毗予一人永建皇極二日日旁有祲氣向背若環耳崇政使敬翔望之曰兵可憂矣帝為之盱食是日果為晉軍及鎮定之師所敗都將十

餘人被擒餘衆奔潰庚寅制曰扈氏不恭固難去戰鬼  
方未服尚或勞師其蟻聚餘妖狐鳴醜類棄天常而拒  
命據地險以偷生言事討除將期戡定問罪止誅于元  
惡挺災可憫于遺黎每念傷痍良深愧歎應天兵所至  
之地宜令將帥節級嚴戒軍伍不得焚燒廬舍開發丘  
壠毀廢農桑驅掠士女使其背叛之俗知予吊伐之心  
又制曰戎機方切國用未殷養兵須藉于賦租稅粟尚  
煩于力役所在長吏不得因緣徵發自務貪求苟有故

違必行重典立法垂制詳刑定科傳之無窮守而勿失  
中書門下所奏新定格式律令已頒下中外各委所在  
長吏切務遵行盡革煩苛皆除枉濫用副哀矜之旨無  
違欽恤之言詔徵陝州鎮國軍節度使楊師厚至京見  
于崇勲殿帝指授方畧依前充北面都招討使恩膏甚  
厚使督軍進發

五代會要二月晉師侵魏州楊師厚帥師援邢州晉人還師

二月丙

辰朔帝御文明殿羣臣入閣以蔡州順化軍指揮使王  
存儼權知軍州事蔡人久習叛逆刺史張慎思又裒斂



無狀帝追愼思至京而久未命代右廂指揮使劉行琮  
乘虛作亂因縱火驅擁為渡淮計存儼誅行琮而撫遏  
其衆都將鄭遵與其下奉存儼為主而以衆情馳奏時  
東京留守博王友文不先請遂討其亂兵至鄢陵上聞  
之曰誅行琮功也然存儼方懼若臨之以兵蔡必速飛  
矣遂馳使還軍而擢授存儼蔡人安之壬戌詔曰東京  
舊邦久不巡幸宜以今月九日幸東都扈從文武官委  
中書門下量閑劇處分宰臣上言曰龍興天府久望法

駕但陛下始康愈未宜涉寒願少畱清蹕從之

五代會要二月

教食人之食者憂人之事況丞相尊位參決大政而甲  
堂封未給且無餐錢朕甚愧之宜令食萬錢之半

子幸曜村民舍閱農事庚午幸白馬坡詔金吾大將軍待  
制官各奏事武安軍節度使馬殷進呈虔州刺史盧延  
昌牋表虔州本支郡也兵甚銳自得韶州益强大昇為  
百勝軍使始洪州之陷盧光稠願收復使府立功自効  
上因兼授江西觀察畱後光稠卒復命延昌領州事方  
伯亦頗慰薦楊渭遣人偽署爵秩延昌佯受官牒禮遣

其使因湖南自表其事曰郡小寇迫欲緩其奸謀且開導貢路非敢貳也以其偽制來自陳上覽奏曰我方有北事不可不甚加撫卹尋兼授鎮南將軍節度使觀察

留後命使慰勞

九國志盧廷昌耶命于吳偽乞命于梁

三月辛卯以久旱

令宰臣分禱靈迹翼日大澍雨丙申幸甘水亭召宰臣翰林學士尚書侍郎孔續已下八人扈從宴樂甚歡戊戌幸右龍虎軍召文武官四品已上宴于新殿甲辰幸左龍虎軍新殿宴文武官四品已上四月丁卯幸龍虎

門召宰臣學士金吾上將軍大將軍侍宴廣化寺壬申  
契丹遣使來貢丁丑幸宣威殿宴文武官四品已上及  
軍使蕃客己卯又幸左龍虎軍宴羣臣詔曰邠岐未滅  
關隴多虞宜擇親賢總茲戎任應闕西同雍華廊延夏  
等六道兵馬并委冀王收管指揮凡有抽差先申西面  
都招討使仍別奏聞庶合機權以寧邊鄙五月甲申朔  
帝被冕旒御朝元殿視朝伏衛如式制改開平五年為  
乾化元年大赦天下詔方伯州牧近未加恩者並遷爵

秩復大賚軍旅普宴于宣威殿賜帛各有差制封延州  
節度使高萬興為渤海郡王諸道節度使錢鏐張宗奭  
馬殷王審知劉隱各賜一子六品正員官高季昌賜一  
子八品正員官賀德倫賜一子九品正員官癸巳觀稼  
于伊水登建春門幸會節坊張宗奭私第臨亭臯視物  
色賞賜甚厚左銀臺門朝參諸司使庫使已下不得帶  
從人入城親王許一二人執條床手簡餘悉止門外闌  
入者抵律閤守不禁與所犯同先是門通內無門籍且

多勲戚車騎衆者尤不敢呵察至是有以客星凌犯上  
言者遂令止隔海清軍節度使守侍郎兼中書令劉隱  
薨輟朝三日百僚詣閤門奉慰六月乙卯命北面都招  
討使鎮國軍節度使楊師厚出屯邢洺丁巳鎮定鈔我  
湯陰詔曰常山背義易水效尤誘其蕃戎動我邊鄙南  
侵相魏東出邢洺是用遣將徂征為人除害但初頒赦  
令不次貪言宵而伐之諒非獲已况聞謀始不自帥  
致此厲階並由姦佞密通人使潛結沙陀既懼罪誅

生離叛今雖行討代已舉師徒亦開詔諭之門不阻  
降之路矧又王鎔處直未曾削爵除名若翻然改圖不  
遠而復必仍舊貫當保全功如有率衆尙明拔州效順  
亦行殊賞冀徇來情免令受弊于疲民用示惟新于汚俗  
宜令行營都招討使及陳暉軍前准此敕文散加招諭  
將安衆懼特舉明恩鎮州只罪李弘規一人其餘一切  
不問詔修天宮佛寺又湖南奏潭州僧法思桂州僧歸  
真竝乞賜紫衣從之七月帝不豫稍厭秋暑自辛丑幸

會節坊張宗奭私第宰臣視事于歸仁亭子崇政使內  
諸司及翰林院並止于河南令廨署至甲辰復歸大內  
八月庚申幸保寧殿閱天興控鶴兵事軍使將校各有  
賜癸亥老人星見戊辰幸故上陽宮至于榆林觀稼丙  
子閱四蕃將軍屯衛兵士于天津橋南至龍門廣化寺  
戊寅幸興安鞠場大教閱帝自指麾無不踊抃坐作進  
退聲振宮掖右神武統軍丁審衡對御以紅帛囊劍擬  
乘輿物帝曰宿將也恕之以劉重霸代其任九月辛巳



朔帝御文明殿羣臣入閣刑法待制官各奏事己丑宴羣臣于興安殿庚子親御六師次于河陽甲辰至于衛州乙巳至于宜溝幸民劉達墅丙午至相州賞左親騎指揮使張仙右雲騎指揮使宋鐸嘗身先臨陣各賜帛十月辛亥朔駐蹕于相州宰臣洎文武從官竝詣行宮起居戶部郎中孔昌序齋留都百官冬朔起居表至自西京諸道節度使刺史諸藩府留後各以冬朔起居表來上制以邦王友珪充控鶴指揮使諸軍都虞侯闕寶

為御營使有司以立冬太廟薦享上言詔丞相杜曉赴  
西都攝祭行事癸丑閏武于州闥之南樓左龍驤都教  
練使鄧季筠魏博馬軍都指揮使何令稠右廂馬軍都  
指揮使陳令勳以部下馬瘦竝腰斬于軍門甲寅將以  
其夕幸魏縣命閤門使李郁報宰臣兼勅内外是夜車  
駕發輒于都署乙卯次洹水丙辰至魏縣先鋒將黃文  
靖伏誅己未帝御朝元門以回鶻吐蕃二大國首領入  
覲故也癸亥令諸軍指揮使及四蕃將軍賜食于行宮之

外廡戊辰幸邑西之白龍潭以觀魚焉旣而漁人獲巨魚以獻帝命放之中流從臣以帝有仁惻之心皆相顧欣然是日名其潭曰萬歲潭丙子帝御城東教場閱兵諸軍都指揮北面招討使太尉楊師厚總領鐵馬步甲十萬廣亘十數里陳焉士卒之雄銳部隊之嚴肅旌旗之雜還戈甲之炤曜屹若山岳勢動天地帝甚悅焉即命丞相洎文武從臣列侍賜食逮晚方歸十一月辛巳朔上駐蹕魏縣從官自丞相而下並詣行宮起居畱都

文武百官及諸道節度使防禦使刺史諸藩府留後各

奉表起居壬午帝以邊事稍息宣命還京師

通鑑帝以  
夾寨柏鄉

屢失利故力疾北巡思一雪其恥意鬱鬱多躁忿功臣宿將往往以小過被誅衆心益懼既而晉趙兵不出十

一月壬午  
帝南還

車駕發自行闕夕次洹水縣癸未至內黃縣

甲申至黎陽縣乙酉命從官丞相而下宴于行次丁亥

次衛州戊子晨次新鄉夕止獲嘉己丑次武陟庚寅次

溫縣延州節度使高萬興奏當軍都指揮使高萬金統

領兵士今月五日收鹽州偽刺史高行存泥首來降丞

相及文武百官各上表稱賀辛卯次孟州命散騎常侍  
孫騰右諫議大夫張衍光祿卿李翼各齋香祝版告祭  
于孟津之望祠畱都文武官左僕射楊涉洎孟州守李  
周彝等皆匍匐東郊迎拜其文武官竝令先還壬辰詰  
旦離孟州晚至都宣宰臣各赴望祠禱雨故事皆以兩  
省無功職事為之帝憂民重農以足食足兵為念爰自  
御極每愆陽積陰多命丞相躬其事辛丑大雨雪宰臣  
及文武師長各奉表賀焉十二月詔以時雪稍愆命丞

相及三省官各詣望祠祈禱癸酉臘假詔諸王與河南  
尹左右金吾六統軍等較獵于近苑命大理卿王鄩使  
于安南左散騎常侍吳藹使于朗州皆以旌節官誥錫  
之也又命將作少監姜弘道為朗州旌節官使副

五代  
會要

舊制巡撫黜陟冊命吊贈入番等使選朝臣為之具宣  
慰加官送旌節即以中官為之今以三品送旌節新例

也延州節度使高萬行奏領軍于邠州界萬子谷韋家

寨殺戮寧慶兩州賊軍約二千餘人竝生擒都頭指

使及奪馬器甲等事其入奏軍將使宣召赴內殿賜

卹

以銀器絲物錫之宰臣及文武官各奉表賀是月魏

節度上言于涇縣北戮殺鎮州王鎔兵士七千餘人本

馬二千餘匹戈甲未知其數竝擒都將以下四十餘人

兩浙進大方茶二萬觔琢畫宮衣五百副廣州貢犀象

奇珍及金銀等其估數千萬安南兩使畱後曲美

通鑑  
十二

戊午以靜海曲  
美為節度使

進筒中蕉五百匹龍腦鬱金各五瓶他

海貨等有差又進南蠻通好金器六物銀器十二并乾

陀綾花緞越跣等雜織奇巧者各三十件福建進戶部

所支權課葛三萬五千匹



舊五代史卷六

舊五代史卷六攷證

梁太祖紀六相州刺史李思安為先鋒使 相原本訛

湘今據通鑑改正

向背若環耳 環耳原本訛環爾今據五代會要改正

以其偽制來自陳 偽原本訛為今改正

守侍中兼中書令劉隱卒 案劉隱卒五代會要五代

春秋俱作五月惟通鑑作三月與是書異

丁巳鎮定抄我湯陰 湯陰原本作蕩陰今從通鑑及

歐陽史改正

命閤門使李郁報宰臣兼敕內外 案李郁下行寶字

今據列傳刪正

己未帝御朝元門以回鶻吐蕃入覲故也 案己未歐

陽史作乙未

舊五代史卷六攷證

欽定四庫全書

舊五代史卷七

宋門下侍郎參知政事監修國史薛居正等撰

梁書第七

太祖紀七

乾化二年正月宣上元夜任諸市及坊市各點彩燈金  
吾不用禁夜近年以來以都下聚兵太廣未嘗令坊市  
點燈故也甲申以時雪久愆命丞相及三省官羣望祈

禱詔曰謗木求規集囊貢事將裨理道豈限側言應內  
外文武百官及草澤竝許上封事極言得失以丁審衡  
為陳州而審衡厚以鞍馬金帛為謝恩之獻帝慮其漁  
民復其獻而停之封保義節度使王檀為琅琊郡王命  
供奉官朱嶠于河南府宣取先收禁定州進奉官崔騰  
竝謙從一十四人竝釋放仍命押領送至貝騰唐戶部  
侍郎潔之子也廣明喪亂客于北諸侯為定州節度使  
王處存所辟去載領貢獻至闕未幾其帥稱兵遂繫之

至是帝念賓介之來人已出境特命縱而歸焉丙戌有  
司以孟春太廟薦享上言命丞相杜曉攝祭行事丙申  
夕熒惑犯房第二星二月庚戌中和節御崇勲殿召丞  
相大學士河南尹畧封訖于萬春門外廡賜以酒食

五代

會要二月追封故魏博節度使羅弘信為趙王

癸丑勅曰今載春寒頗甚雨澤

仍愆司天監占以夏秋必多霖潦宜令所在郡縣告喻  
百姓備淫雨之患庚申御宣威殿開宴丞相洎文武官  
屬咸被召列侍竟日而罷壬戌帝將巡按北境中外戒

嚴詔以河南尹守中書令判六軍事張宗奭為大內留  
守中書門下奏差定文武官領務尤切宜扈駕者三十  
八人詔工部尚書李皎左散騎常侍孫騰左諫議大夫  
張衍兵部侍郎劉邈兵部郎中張雋光祿少卿盧秉燾  
竝令扈蹕甲子發自雒師夕次河陽通鑑云至白馬頓  
賜從官食多未至  
遣騎趣之于路左散騎常侍孫騰右諫議大  
夫張衍兵部郎中張雋最後至帝命撲殺之乙丑次溫  
縣丙寅次武陟懷州刺史段明遠迎拜于境上其內外  
所備咸豐需焉丁卯次獲嘉戊辰次衛州之新鄉己巳

晨發衛夕止淇門內衛十將使以十指揮兵士至于行  
在辛未駐蹕黎陽癸酉發自黎陽夕次內黃甲戌次昌  
樂縣丁丑次于永濟縣青州節度使賀德倫奏統領兵  
士赴歷亭軍前戊寅至貝州命四丞相及學士李琪盧  
文度知制誥竇賞等十五人扈從其左常侍韋戩等二  
十三人止焉己卯發自貝州夕駐蹕于野落三月庚辰  
朔次于棗強縣之西原通鑑辛巳至下博南登觀津冢  
趙將符習引數百騎巡邏不知  
是帝遂前逼之或告曰晉兵大至矣帝  
棄行幄亟引兵趣棗強與楊師厚軍合  
丙戌鎮定諸軍



招討使楊師厚奏下棗彊縣車駕即日疾馳南還丁亥  
復至貝州庚寅楊師厚與副招討李周彝等准詔來朝  
辛卯詔丞相翰林六學士文武從官都招討使及諸軍  
統指揮使等賜食于行殿壬辰命以羊酒等各賜從官  
甲午幸貝州之東闐閼武乙未帝復幸東闐閼騎軍敕  
以攻下棗彊縣有功將校杜暉等一十一人竝超加檢  
校官衙官宋彥等二十五人竝超授軍職丙午次濟源  
縣詔曰淑律將遷亢陽頗甚宜令魏州差官祈禱龍潭

戊申詔曰雨澤愆期祈禱未應宜令宰臣各于魏州靈

祠精加祈禱

五代會要三月詔曰夫隆興邦國必本于人民惠養疲羸凡資于令長苟選求之踰

濫同撫理之乖違如聞吏部擬官中書降授或緣親舊所請或為勢要所干姑徇私情靡求才實茲念蠹弊宜舉條章今後應中書用人及吏部注擬並宜省藩身之才業驗為政之否臧必有可觀方可任用如或尚行請說猶假貸財其所司人吏必當推窮重加懲斷四月己酉幸魏州金波亭賜宴

宰臣文武官及六學士甲寅夕月掩心大星丙辰勅近者星辰違度式在修禳宜令兩京及宋州魏州取此月至五月禁斷屠宰仍各于佛寺開建道場以迎福應已

未次黎陽縣

通鑑乙卯博王友文來朝請帝還東都  
丁巳發魏州己未至黎陽以疾淹留

東

都畱守官吏奉表起居賜丞相從官酒食有差己巳至

東都博王友文以新創食殿上言并進準備內宴錢三

千貫銀器一千五百兩辛未宴于食殿召丞相及大武

從官等侍馬帝泛九曲池御舟傾帝墮溺于池中宮女

侍官扶持登岸驚悸久之制加建昌宮使金紫光祿大

夫檢校司徒開封尹博王友文為特進檢校太保無開

封尹依前建昌宮使充東都畱守戊寅車駕發自東京

夕次中牟縣五月己卯朔從官文武自丞相而下竝詣  
行殿起居親王及諸道藩帥咸奉表來上庚辰發鄭州  
至滎陽河南尹魏王宗奭望塵迎拜河陽畱後贊懷州  
刺史段明遠等遞迺來迎夕次汜水縣帝召魏王宗奭  
入對便于御前賜食數刻乃退壬午駐蹕于汜水宰臣  
河南尹六學士竝于內殿起居敕以建昌宮事委宰臣  
于統領之

五代會要其年六月廢昌宮以河南尹魏王  
張宗奭為國計使凡天下金穀兵戎舊隸建

昌宮者  
悉主之

癸未帝發自汜水宣令邵贊段明遠各歸所理

午憇任村頓夕次孝義宮留都文武禮部尚書孔續而  
下道左迎拜次偃師甲申至都文武臣奉迎于東郊渤  
海遣使臣貢宰臣薛貽矩抱恙在假不克扈從宣問旁  
午仍命且駐東京以俟良愈及薨帝震悼頗久命維苑  
使曹守璫往弔祭之又命輟六日七日八日朝參丞相  
文武並詣上閣門進名奉慰丁亥以彗星謫見詔兩京  
見禁囚徒大辟罪以下遞減一等限三日內疏理訖聞

奏

五代會要彗見于靈臺之西至五月始降赦宥罪以  
答天譴又云五月壬戌夜熒惑犯心大星去心四度

順行司天奏大星為帝王之星宜修省以答天譴

詔曰生育之人爰當暑月乳

哺之愛方及薰風儻肆意于刳屠豈推恩于長養俾無殄暴以助發生宜令兩京及諸州府夏季內禁斷屠宰及採捕天民之窮諒由賦分國章所在亦務興仁所在鰥寡孤獨廢疾不濟者委長吏量加賑卹史載葬枯用彰軫恤禮稱掩骼將致和平應兵戈之地有暴露骸骨委所在長吏差人專功收瘞國瘍之文尚標七祀良藥之市亦載三醫用憐無告之人宜徵有喜之術凡有疫

之處委長吏檢尋醫方于要路曉示如有家無骨肉魚  
困窮不濟者即仰長吏差醫給藥救療之辛卯詔曰亢  
陽滋甚農事已傷宜令宰臣于兢赴中嶽杜曉赴西嶽  
精切祈禱其近京靈廟宜委河南尹五帝壇風師雨師  
九宮貴神委中書各差官祈之

通鑑閏月壬戌帝疾甚  
謂近臣曰我經營天下

三十年不意太原餘孽更昌熾如此吾觀其志不小天  
復奪我年我死諸兒非彼敵也吾無葬地矣因哽咽絕  
而復蘇帝長子柳王友裕早卒次假子友文帝特愛之  
常畱守東都兼建昌宮使次郢王友珪其母亳州營倡  
也為左右控鶴都指揮使火均王友貞為東都馬步都  
指揮使初元貞張皇后嚴整多智帝敬憚之后殂帝縱

意聲色諸子雖在外常微其婦入侍帝往往亂之友文  
婦王氏色美帝尤寵之雖未以友文為太子帝意常屬  
之友珪心不平友珪常有過帝撻之友珪益不自安帝  
疾甚命王氏召友文于東都欲與之訣且付以後事友  
珪婦張氏亦朝夕侍帝側知之密告友珪曰大家以傳  
國寶付王氏懷往東都吾屬死無日矣夫婦相泣左右  
或記之曰事急計生何不改圖時不可失六月丁丑朔  
帝令敬翔出友珪為萊州刺史即令之官已宣旨未行  
勅時左遷者多追賜死友珪益恐戊寅友珪易服微入  
左龍虎軍見統軍韓勅以情告之勅亦見功臣宿將多  
以小過被誅懼不自保遂相與合謀勅以牙兵五百人  
從友珪雜控鶴士入伏于禁中夜斬關入至寢殿侍疾  
者皆散走帝驚起問反者為誰友珪曰非它人也帝曰  
我固疑此賊恨不早殺之汝悖逆如此天地豈容汝乎  
友珪曰老賊萬段友珪僕夫馮廷諤刺帝腹反出于背  
友珪自以敗斃裹之瘞于寢殿秘不發喪遣供奉官丁



昭博馳詣東都命均王友貞殺友文己卯矯詔稱博王友文謀逆遣兵突入殿中賴鄆王友珪忠孝將兵誅之保全朕躬然疾因震驚彌致危殆宜令友珪權主軍國之務韓勅為友珪謀多出府庫金帛賜諸軍及百官以取悅辛巳丁昭博還聞友文己友珪葬太祖于伊闕縣死乃發喪宣遺制友珪即位

號宣陵

五代會要太祖崩年六十一中書侍郎平章事杜曉撰哀冊文門下侍郎平章事趙光遠撰謚

冊文太常卿李燕撰謚議五代史補太祖朱全忠黃巢之先鋒巢入長安以刺史王鐸圓同州太祖遂降鐸承制拜同州刺史黃巢滅淮蔡間秦宗權復威朝廷以淮蔡與汴州相接太祖汴人必究其能否遂移授宣武軍節度使以討宗權未幾滅之自是威福由已朝廷不能制遂有天下先是民間傳讖曰五公符又謂之李淳風轉天歌其字有八牛之年識者以八牛乃朱字則太祖革命之應焉太祖之用兵也法令嚴峻每戰逐隊

主帥或有沒而不反者其餘皆斬之謂之跋隊斬自是戰無不勝然健兒且多竄匿州郡疲于追捕因下令文面健兒文面自此始也五代史闕文世傳梁太祖迎昭宗于鳳翔素服待舉昭宗佯為襁系脫呼梁祖曰全忠為吾繫鞵梁祖不得已跪而結之流汗浹背時天子扈蹕尚有衛兵昭宗意謂左右擒梁祖以殺之其如無敢動者自是梁祖被召多不至盡去昭宗禁衛皆用汴人矣臣謹案梁祖以天復三年迎唐昭宗于岐下歲在甲子其年改元祐至國初建隆庚申歲纔五十六年矣然則乾德七十歲人皆目覩其事蓋唐室自懿宗失政天下亂離故武宗以下實錄不傳于世昭宗一朝全無記注梁祖在位止及六年均帝朝詔史臣修梁祖實錄岐下繫鞵之事恥而不書晉天福中史臣張昭重修唐史始有昭宗本紀但云即位之始有會昌之風岐陽事迹不能追補此亦明唐昭宗有英睿之氣而衰運不振又明左右無忠義奮發之臣致梁祖得行其志有所警

誠不可  
不書

舊五代史卷七

舊五代史卷七考證

梁太祖紀七仍命押領送至貝貝原本訛其今據通

鑑改

畧封訖案此下疑有闕文今無可校姑仍之

晨發衛州案原本脫發字今據文增入

三月庚辰朔次于棗彊縣之西原案通鑑辛巳趣棗

彊與是書異

丙戌奏下棗彊縣車駕即日南還丁亥復至貝州案通

鑑帝以舊縣未下引兵攻之丁亥始至縣西戊子至  
冀州與是書異地又案五代春秋二月侵趙克棗強  
與是書異月

四月己酉幸魏州 案通鑑乙巳帝發貝州丁未至魏  
州俱在三月與是書異

宜微有喜之術 喜原本訛嘉今改正

九宮貴神 貴原本訛降今據通典及新唐書改正

舊五代史卷七考證

欽定四庫全書

舊五代史卷八

宋門下侍郎參知政事監修國史薛居正等撰

梁書第八

末帝紀上

末帝諱瑱初名友貞及即位改名鐸貞明中又改今諱  
太祖第四子也母曰元貞皇后張氏以唐文德元年戊  
申歲九月十二日生於東京帝美容儀性沈厚寡言雅

好儒士唐光化三年授河南府參軍太祖受禪封均王時太祖初置天興軍最為親衛以帝為左天興軍使開平四年復進位檢校司空依前天興軍使充東京馬步軍都指揮使乾化二年六月二日庶人友珪弑逆矯太祖詔遣供奉官丁昭溥馳至東京密令帝害溥王友文友珪即位以帝為東京留守行開封尹檢校司徒友珪以篡逆居位羣情不附會趙巖至東京從帝私讌因言及社稷事帝以誠款謀之巖曰此事易如反掌成敗在

招討楊令公之手但得一言諭禁軍其事立辦巖時典  
禁軍洎還洛以謀告侍衛親軍袁象先帝令腹心馬慎  
交之魏州見師厚且言成事之日賜勞軍錢五十萬緡  
仍許兼鎮慎交燕人也素有膽辨乃說師厚曰郢王殺  
君害父篡居大位宮中荒淫靡所不至洛下人情已去  
東京物望所歸公若因而成之則有輔立之功討賊之  
効師厚猶豫未決謂從事曰吾子郢王君臣之分已定  
無故改圖人謂我何慎交曰郢王以子弑父是曰元兇



均王為君為親正名仗義彼若一朝事成令公何情自  
處師厚驚曰幾誤計耳乃令小校王舜賢至洛密與趙  
巖袁象先圖議時有左右龍驤都在東京帝偽作友珪  
詔遣還洛下先是劉重遇部下龍驤一指揮于懷州叛  
經年搜捕其黨帝因遣人激怒其衆曰郢王以龍驤軍  
嘗叛汝等洛下將盡坑之翼日乃以偽詔示之通鑑攷異  
云梁太祖實錄丙戌東京言龍驤軍准詔追赴西京軍  
情不肯進發實友珪徵之非友貞偽作但激怒言坑之  
耳諸軍憂恐將校垂泣告帝乞指生路帝諭之曰先帝

三十餘年經營社稷千征萬戰爾等皆曾從行今日先帝尚落人奸計爾等安所逃避因出梁祖御容以示諸將帝欷歔而泣曰郢王賊害君父違天逆地復欲屠滅親軍爾等苟能自趨洛陽擒取逆豎告謝先帝即轉禍為福矣衆踊躍曰王言是也皆呼萬歲請帝為主時偽鳳厯元年二月十五日也帝乃遣人告趙巖袁象先傳暉朱珪等十七日象先引禁軍千人突入宮城遂誅友珪事定象先遣趙巖賞傳國寶至東京請帝即位于洛

陽帝報之曰夷門太祖創業之地居天下之衝北拒并  
汾東至淮海國家藩鎮多在厥東命將出師利于便近  
若都洛下非良圖也公等如堅推戴冊禮宜在東京賊  
平之日即謁洛陽陵廟是月帝即位于東京乃去鳳厯  
之號稱乾化三年詔曰我國家賞功罰罪必叶朝章報  
德伸免敢欺天道苟顯違于法制雖暫滯于歲時終振  
大綱須歸至理重念太祖皇帝嘗開霸府有事四方迨  
建皇朝載遷都邑每以主留重務居守難才慎擇親賢

方膺寄任故博王友文才兼文武識達古今俾分憂于  
在浚之郊亦共理于興王之地一心無易二紀于茲嘗  
施惠于士民實有勞于家國去歲郢王友珪常懷逆節  
已露凶鋒將不利于君親欲竊窺于神器此際值先皇  
寢疾大漸日臻博王乃密上封章請嚴宮禁因以萊州  
刺史授于郢王友珪纔覩宣頭俄行大逆豈有自縱兵  
于內殿却翻事于東都又矯詔書枉加刑戮乃奪博王  
封爵又改姓名冤恥兩深欺誑何極伏賴上玄垂祐宗

社降靈俾中外以叶謀致遐邇之共怒尋平內難獲勦  
元兇既雪恥于同天且免譏于共國朕方期遁世敢竊  
臨人遽迫推崇爰膺纘嗣寃憤既伸于幽顯霈澤宜及  
于下泉博王宜復官爵仍令有司擇日歸葬云三月丁  
未制曰朕仰膺天睠近雪家讎旋聞將相之謀請紹祖  
宗之業羣情見迫三讓莫從祇受推崇懼不負倚方欲  
蒸嘗寢廟煙類郊丘合徵文體之辭用表事神之敬其  
或于文尚淺在理未周亦冀隨時別圖制義雖臣子行

孝重更名于已孤而君父稱尊貴難知而易避今則虔  
遵古典詳考前聞允諧龜筮之占庶合帝王之道載惟  
涼德尤愧嘉名中外羣寮當體朕意宜改名鎰庚戌以  
天雄軍節度使充潞州行營都招討使開府儀同三司  
檢校太尉兼侍中弘農郡王揚師厚為檢校太師兼中  
書令進封鄴王壬戌以夏州節度使檢校太尉同平章  
事李仁福為檢校太師進封隴西郡王戊辰以邢州保  
義軍留復檢校太保戴思遠為檢校太傅充邢州節度

使庚午以鎮東軍節度副使充兩浙西面都指揮使行  
睦州刺史馬綽為檢校太傅同平章事領秦州雄武軍  
節度使進封開國侯是月文武百官上言請以九月十  
二日帝降誕日為明聖節休假三日從之夏四月癸未  
以西京內外諸軍馬步軍都指揮使檢校司徒左龍虎  
統軍濮陽郡開國侯袁象先為特進檢校太保同平章  
事充鎮南軍節度江南西道觀察處置等使開封尹判  
在京馬步諸軍事進封開國公增食邑一千戶丁酉宣

義軍節度副大使知節度事鄭滑濮等州觀察使檢校  
太傅長沙郡開國公羅周翰加特進駙馬都尉五月乙  
巳天雄軍節度使楊師厚及劉守奇率魏博邢洺徐兗  
鄆滑之衆十萬討鎮州庚戌營于鎮之南門外壬子晉  
將史建瑭自趙州領騎五百入于鎮州師厚知其有備  
自九門移軍于下博劉守奇以一軍自貝州掠冀州衡  
水阜城陷下博師厚自弓高渡御河逼滄州張萬進懼  
送款師厚表請以萬進為青州節度使以劉守奇為滄



州節度使詔曰太祖皇帝六月一日大忌朕聞姬周已  
還並用通喪之禮炎漢之後方行易月之儀歷代相沿  
萬幾斯重遂為故實難遽改更朕頃遘家寃近平內難  
倏臨祥制俯迫忌辰音容永遠而莫追號感彌深而難  
抑將欲表宅憂于中禁是宜輟聽政于外朝雖異常儀  
願申罔極宜輟五月二十二日至六月二十九日朝參  
軍機急切公事即不得留滯並仰畫時間奏施行宰臣  
文武百官三上表以國忌廢務多日請依舊制詔報曰

朕聞禮非天降固可酌于人情事繫孝思諒無妨于國體今以甫臨忌日暫輟視朝冀全哀戚之情用表始終之節宰臣等累陳章表備述古今慮以萬幾之繁議以五日之請雖茲懇切難盡允俞況保身方荷于洪基敢言過毀而權制獲申于至性必在得中宜自今月二十九日輟至六月七日無煩抑請深體朕懷六月戊子以滄州順化軍節度使并潞鎮定副招討使檢校太傅同平章事張萬進為青州節度使秋九月甲辰以光祿大

夫守御史大夫吳興郡開國侯姚洎為中書侍郎平章事十二月庚午以前鄆州節度使檢校司徒食邑二千戶福王友璋為許州節度使檢校太保是月晉王收幽州執偽燕主劉守光及其父仁恭歸晉陽

乾化四年春正月壬寅以青州節度使張萬進為兗州節度使檢校太尉二月甲戌以感化軍節度使華商等州觀察使檢校太傅同平章事太原郡開國公康懷英為大安尹充永平軍節度使大安金棣等州觀察處置

使夏四月丁丑以守司空平章事于兢為工部侍郎尋  
貶萊州司馬以其挾私與軍校遷改故也是日以行營  
左先鋒馬軍使濮州刺史王彥章為澶州刺史充行營  
先鋒步軍都指揮使加光祿大夫檢校太保封開國伯  
以永平軍節度使檢校太傅同平章事劉鄩為開封尹  
遙領鎮南軍節度使五月癸丑朔方軍留後檢校司徒  
韓洙起復授朔方軍節度使檢校太保秋七月晉王率  
師自黃澤嶺東下寇邢洺魏博節度使楊師厚軍于漳

水之東晉將曹進金來奔晉軍遂退九月徐州節度使王殷反時朝廷以福王友璋鎮徐方殷不受代乃下詔削奪殷在身官爵仍令却還本姓蔣便委友璋及天平軍節度使牛存節開封尹劉鄩等進軍攻討是時蔣殷求救于淮南楊溥遣大將軍瑾率衆來援存節等逆擊敗之

貞明元年春牛存節劉鄩拔徐州逆賊蔣殷舉族自燔而死于火中得其屍梟首以獻詔福王友璋赴鎮閏二

月甲午延州節度使太原西面招討應接使檢校太師  
兼中書令渤海郡王高萬興進封渤海王三月辛酉朔  
以天平軍節度副大使知節度事兼淮南西北面行營  
招討應接等使檢校太傅同平章事牛存節為檢校太  
尉加食邑一千戶賞平徐之功也丁卯以右僕射兼門  
下侍郎同平章事監修國史判度支趙光逢為太子太  
保致仕魏博節度使楊師厚薨輟視朝三月初師厚握  
強兵據重鎮每邀朝廷姑息及薨輟視朝三日或者以

為天意祖庸使趙巖祖庸判官邵贊獻議于帝曰魏博六州精兵數萬蠹害唐室百有餘年羅紹威前恭後倨太祖每深含怒太祖尸未屬繼師厚即肆陰謀蓋以地廣兵強得肆其志不如分削使如身使臂即無不從也陛下不以此時制之寧知後之人不為楊師厚耶若分割相魏為兩鎮則朝廷無北顧之患矣帝曰善即以平盧軍節度使賀德倫為天雄軍節度使遣劉鄩率兵六萬屯河朔詔曰分疆裂土雖賞勲勞建節屯師亦從機

便比者魏博一鎮巡屬六州為河朔之大藩實國家之  
巨鎮所分憂寄允謂重難將叶事機須期通濟但緣鎮  
定賊境最為魏博親鄰其次相衛兩州皆控澤潞山口  
兩道並連于晉土分頭常寇于魏封既須日有戰爭未  
若俱分節制免勞兵力因奔命于兩途稍泰人心俾安  
居于終日其相州宜建節度為昭德軍以澶衛兩州為  
屬郡以張筠為相州節度使已丑魏博軍亂因節度使  
賀德倫是時朝廷既分魏博六州為兩鎮命劉鄩統大



軍屯于南樂以討王鎔為名遣澶州刺史行營先鋒步  
軍都指揮使王彥章領龍驤五百騎先入于魏州屯于  
金波亭詔以魏州軍兵之半隸于相州并徙其家焉又  
遣主者檢察魏之帑廩既而德倫促諸軍上路姻族辭  
決哭聲盈巷其徒乃相聚而謀曰朝廷以我軍府強盛  
故設法殘破况我六州厯代藩府軍門父子姻族相連  
未嘗遠出河門離親去族一旦遷于外郡生不如死三  
月二十九日夜魏軍乃作亂放火大掠首攻龍驤軍王

彥章斬關而遁遲明殺德倫親軍五百餘人于牙城執  
德倫置之樓上有効節軍校張彥者最為麤暴膽氣伏  
人乃率無賴輩數百止其剽掠是日魏之士庶被屠戮  
者不可勝紀帝聞之遣使齎詔安撫

通鑑夏四月帝遣  
供奉官扈異撫諭

魏

軍乃許張彥除郡厚賜將士優賞彥等不遜投詔于地

侮罵詔使因迫德倫飛奏請却復相衛抽退劉鄩軍帝  
復遣諭曰制置已定不可改易如是者三彥等奮臂南  
向而罵曰傭保兒敢如是也復迫德倫列其事時有文

史司空題者甚有筆才彥召見謂曰為我更草一狀詞  
宜抵突如更敢違則渡河擄之乃奏曰臣累拜封章上  
聞天聽在軍衆無非共切何朝廷皆以為閑半月三軍  
切切而戈矛未息一城生聚皇皇而控告無門惟希俯  
鑒丹衷苟從衆欲須垂聖允斷在不疑如或四向取謀  
俱慮六州俱失言非意外事在目前張彥又以楊師厚  
先兼招討使請朝廷依例授之故復逼德倫奏曰臣當  
道兵甲素精貔貅極銳下視并汾之敵平吞鎮定之人

特乞委臣招討之權試臣湯火之節苟無顯効任賜明  
誅詔報曰魏博寇敵接連封疆懸遠凡于應赴須在師  
徒是以別建節旄各令捍禦并鎮則委魏博控制澤潞  
則遣相衛枝梧咸逐便安貴均勞逸已定不移之制宜  
從畫一之規至于征伐事權亦無定例且臨清王領鎮  
之日羅紹威守藩以來所領事銜本無招討祇自楊師  
厚先除陝滑二帥皆以招討兼權因茲帶過鄴中原本  
本不曾落下苟循事體寧怯施行況今劉鄩指鎮定出

征康懷英往邠岐進討祗令統帥師旅亦無招討使銜  
切宜徧諭羣情勿興浮議倚注之意卿宜體之詔至張  
彥瓌裂抵之于地謂德倫曰梁主不達時機聽人穿鼻  
城中擾攘未有所依我甲兵雖多須資勢援河東晉王  
統兵十萬匡復唐朝世與大梁仇讎若與我同力事無  
不濟請相公改圖以求多福德倫不得已而從之乃遣  
牙將曹廷隱奉書求援于太原彥使德倫告諭軍城曰  
可依河東稱天祐十三年此後如有人將文字于河南

往來便仰所在處置是月邠州留後李保衡以城歸順  
保衡楊崇本養子也崇本乃李茂貞養子任邠州二十  
餘年去歲為其子彥魯所毒彥魯領知州事五十餘日  
保衡殺彥魯送款于帝即以保衡為華州節度使以河  
陽留後霍彥威為邠州節度使五月晉王率師赴魏州  
節度使牛存節薨是月鳳翔李茂貞遣偽署涇州節度  
使劉知俊率師攻邠州以李保衡歸順故也自是凡攻  
圍十四月節度使霍彥威諸軍都指揮使黃貴堅守捍

寇會救軍至岐人乃退六月庚寅晉王入魏州以賀德倫為大同軍節度使舉族遷于晉陽是月晉人陷德州

秋七月又陷澶州刺史王彥章棄城來奔

通鑑晉人夜襲澶州刺史

王彥章在劉鄩營  
晉人獲其妻子

是月劉鄩自洹水潛師由黃澤路西

趨晉陽至樂平縣值霖雨積旬乃班師還次宗城遂至

貝州軍於堂邑遇晉軍轉關數十里晉軍稍退翼日鄩

移軍于莘八月賀瓌收復澶州九月以行營先鋒步軍

都指揮使行澶州刺史檢校太保王彥章為汝州防禦

使依前行營先鋒步軍都指揮使壬午正衙命使冊德妃張氏是夕妃薨冬十月辛亥康王友弢謀反伏誅是夕帝于寢殿熟寐忽聞御榻上寶劍有聲帝遽起視之而友弢之黨已入于宮中帝揮之獲免

清異錄末帝夜于寢間擒刺客

乃康王友弢所遣帝自戮之造雲母匣貯所用劍名匣曰護聖將軍之館

壬午葬德妃張氏

十一月乙丑改乾化五年為貞明元年十二月乙未詔升華原縣為崇州靜勝軍以美原縣為裕州以為屬郡以偽命義勝軍節度使鼎耀等州觀察使特進檢校太



保同平章事李彥韜為特進檢校太傅同平章事充靜  
勝軍節度使崇裕等州觀察使河內郡開國侯仍復本  
姓溫名昭圖昭圖華原賊帥也李茂貞以養子以華原  
為耀州美原為鼎州偽命昭圖為節度使至是歸款故  
有是命

貞明二年春正月庚申以皇伯父宋州節度使開府儀  
同三司檢校太師兼中書令廣王全昱為守中書令餘  
如故

通鑑二年春正月宣武節度使  
守中書令廣德靖王全昱卒

以浙江東道營田

副使檢校太傅前常州刺史杜建徽送領涇州節度使  
二月丙申右僕射門下侍郎平章事諸道鹽鐵轉運等  
使楊涉罷相守左僕射涉累上章以疾辭位故有是命  
是月命許州節度使王檀河陽節度使謝彥章汝州防  
禦使王彥章率師自陰地關抵晉陽急攻其壘不克而  
旋三月劉鄩率師與晉王大戰于故元城鄩軍敗績先  
是鄩駐于莘帝以河朔危急師老于外餉饋不充遣使  
賜鄩詔微有責讓鄩奏以寇勢方盛未可輕動帝又問

鄆決勝之策鄆奏曰但人給糧十斛盡則破敵帝不悅復遣促戰鄆召諸將會議諸將欲戰鄆默然一日引軍攻鎮定之營彼衆大駭上下騰亂俘斬甚衆時帝遣偏將楊延直領軍萬餘人屯澶州以應鄆既而晉王詐言歸太原劉鄆以為信是月召楊延直會于魏城下鄆自率軍亦至與延直會既而晉王自貝州至鄆引軍漸退至故元城西與晉人決戰大為其所敗追襲至河上軍士赴水死者甚衆鄆自黎陽濟河奔滑州已巳制以

郭為滑州宣義軍節度副大使知節度事晉人攻衛州  
陷之又陷惠州夏四月乙酉朔威武軍節度使守太傅  
兼中書令閩王王審知賜號忠勤保安興國功臣餘如  
故晉人陷洺州癸卯夜捉生都將李霸作亂龍驤都將  
杜晏球討平之時遣捉生軍千人戍楊劉軍出宋門外  
是夜由水門復入二鼓大譟火發燭城李霸與其徒燔  
建國門不克龍驤都將杜晏球屯鞠場聞亂兵至率騎  
擊之亂軍退走馬登建國門晏球奏曰亂者惟李霸一

軍但守宮城遲明臣必破之未明晏球誅霸及其同惡  
京師方定是月以行營先鋒步軍都指揮使汝州防禦  
使王彥章為鄭州防禦使依前先鋒步軍都指揮使五  
月晉軍還太原六月晉人急攻邢州帝遣捉生都將張  
溫率步騎五百人入于邢州至內黃溫率衆降于晉人  
秋七月甲寅朔晉王自太原至魏州節度使張筠棄城  
奔京師邢州節度使閻寶以城降于晉王壬戌以淮南  
鎮東等軍節度使充淮南宣潤等道西面行營都統開

府儀同三司尚父守尚書令吳越王錢鏐為諸道兵馬

元帥餘如故以左僕射楊涉為太子太傅致仕八月丁

酉以開府儀同三司太子太保致仕趙光逢為司空兼

門下侍郎平章事弘文館太學士延資庫使充諸道監

鐵轉運使九月晉王還太原滄州節度使戴思遠棄城

來奔晉人陷貝州

歐陽史本紀二年九月晉人克貝州守將張源德死之入死事傳畧云太

祖時源德自金兵衛將軍為蔡州刺史貞明元年魏博節度使楊師厚卒末帝分魏相等六州為兩鎮遣劉鄩將兵萬人屯于魏魏軍叛降晉源德為鄆守貝州晉王入魏諸將欲先擊貝州晉王曰貝城小而堅攻之難卒

下乃先襲破德州黑後以兵五千攻源德源德堅守不下晉軍壅而圍之已而劉鄩大敗于故元城南走黎陽六鎮數十州之地皆歸晉獨貝一州圍之踰年不可下源德守既堅而貝人聞晉已盡有河北城中食且盡乃勸源德出降源德不從遂見殺

己卯天平軍節度副大使知節度事檢

校太師兼中書令瑯邪郡王王檀薨八月丁酉以開府儀同三司中書侍郎兼吏部尚書同平章事集賢殿大學士判戶部敬翔為右僕射兼門下侍郎平章事監修國史判度支以光祿大夫中書侍郎同平章事鄭珣為特進兼刑部尚書平章事集賢殿大學士判戶部十月

晉王自太原至魏州是月前昭義軍節度使檢校太師  
兼侍中陳留郡王葛從周薨是歲河北諸州悉入于晉



舊五代史卷八

舊五代史卷八攷證

梁末帝紀上末帝諱瑱 案瑱原本訛瑱今從歐陽史  
改正

太祖第四子也 案歐陽史作第三子五代會要與是  
書同蓋并假子傅王友文而數之也

以帝為左天興軍使 案原本脫使字今據歐陽史增  
入

帝乃遣人告趙巖袁象先傅暉朱珪等 案原本脫暉

字今據通鑑增入

近雪家讎 案原本脫家字今據冊府元龜增入

濮陽郡開國侯袁象先 濮陽原本作博陽今據象先

本傳改正

師厚自弓高渡逼滄州張萬進懼 滄州原本作涼州

攷歐陽史劉守光傳萬進乃滄州守將今改正

滄州順化軍節度使張萬進為青州節度使 案順化

原本作順俟今據通鑑注滄州為順化軍改正又青

州通鑑作平盧攷後文是時賀德倫為平盧節度使  
當從此書作青州為是

寇邢洺 邢原本作廊今據五代春秋七月來侵邢州  
改正

貞明元年春牛存節劉鄩拔徐州 案徐州之拔是書本

紀及蔣殷傳俱不書月五代春秋及歐陽史俱作正月通

鑑作二月通鑑攷異又作乾化四年十一月未詳孰是

判度支趙光逢 逢原本作逵今據唐書列傳改正

既須日有戰爭 案原本脫戰爭二字今據冊府元龜

增入

王彥章為汝州防禦使 汝州原本作許州今據通鑑

改正

康王友孜謀反 案友孜通鑑作友敬與是書異

十一月乙丑改乾化五年為貞明元年 案通鑑考異

引吳越備史作正月壬辰朔改元大赦歐陽史五代

春秋俱從是書



舊五代史卷八改證

欽定四庫全書

史部  
舊五代史卷九至  
十四

詳校官編修<sub>臣</sub>黃壽齡

洗馬<sub>臣</sub>王坦修覆勘

總校官編修<sub>臣</sub>朱鈴

校對官助教<sub>臣</sub>李巖

謄錄監生<sub>臣</sub>謝雲



欽定四庫全書

舊五代史卷九

宋門下侍郎參知政事監修國史薛居正等撰

梁書第九

末帝紀中

貞明三年春正月戊午以前淄州刺史高允奇爲右羽  
林統軍癸亥以前天平軍馬步軍都指揮使檢校太保  
朱勅爲懷州刺史癸酉以前天武軍使石釗爲密州刺

史戊寅以前懷州刺史李建爲安州刺史仍賜名知節  
己卯以宣義軍節度副大使知節度事北面行營副招  
討等使特進檢校太傅霍彥威爲天平軍節度副大使  
知節度事二月甲申晉王攻我黎陽劉鄩拒之而退乙  
酉前蔡州刺史董璋權知宣義軍軍州事丁亥以前右  
羽林軍統軍梁繼業爲左衛上將軍壬辰以租庸判官  
檢校司徒張紹珪爲光祿卿依前充租庸判官癸巳以  
權知平盧軍軍州事客省使知銀臺事元湘爲檢校司

空甲午以飛龍使婁繼英爲左武衛大將軍三月庚申  
以前平戎軍使檢校司徒郭紹賓爲禧州刺史辛酉以  
前天平軍節度副使裴彥爲隨州刺史戊寅湖州刺史  
錢傳璟蘇州刺史錢傳璚鎮海軍節度副史錢傳瓘溫  
州刺史錢傳璡睦州刺史錢傳琇寶州刺史錢傳瓘明  
州刺史錢傳球義州刺史錢傳琇峯州刺史錢傳珣巒  
州刺史錢傳琰鎮海軍都知兵馬使錢傳璠等凡一十  
一人竝加官勳階爵從吳越王錢鏐之請也夏四月庚

辰以前行左武衛大將軍蔡敬思爲右武衛上將軍辛  
巳以前安州刺史劉玘權知晉州軍州事以前密州刺  
史張實爲潁州刺史充本州團練使癸未以六軍押衙  
充左天武軍使劉彥珪爲澶州刺史辛卯以右千牛衛  
大將軍劉瑑充契丹宣諭使詔諸道兵馬元帥開幕除  
吏一同天策上將府故事辛丑以清海軍元從都押衙  
隴州刺史吳鐸爲檢校司空癸卯以兩浙衙內先鋒指  
揮使守峯州刺史錢傳珣爲泗州刺史六月庚辰以前

東京馬步都指揮使兼左天武軍使雷景從爲汝州刺史充本州防禦使辛卯以租庸判官光祿大夫檢校司徒行光祿卿張紹珪爲申州刺史壬辰以權知晉州建寧軍軍州事前安州刺史劉玘爲建寧軍節度觀察留後秋七月丁巳以淄州刺史陳洪爲棣州刺史乙丑以刑部員外郎封翹爲翰林學士丙寅以汝州刺史楊延直爲左衛大將軍以前左衛上將軍劉重霸爲起復雲麾將軍右驍衛上將軍庚午以六軍諸衛副使起復雲

麾將軍檢校太保張業為淄州刺史八月辛巳以左神武軍統軍周武為寧州刺史以左宗安指揮使前申州刺史劉仁鐸為衍州刺史戊子泰寧軍節度使張萬進賜名守進九月庚申以遙領常州刺史張昌孫遙領壽州刺史充本州團練使冬十月壬午以權西面行營都監左武衛上將軍張筠權知商州軍州事戊子詔曰太子太傅李戩多因釋教誑惑羣情此後不得出入無恒癸巳以前崇德軍使張思綰為左武衛上將軍己亥以

啓聖匡運同德功臣諸道兵馬元帥淮南鎮海鎮東等  
軍節度使充淮南宣潤等四面行營都統開府儀同三  
司尚書令吳越王錢鏐為天下兵馬元帥壬寅以尚書  
左丞吳藹為工部尚書充兩浙官告使是月晉王自魏  
州還太原閏十月丁卯以前商州刺史徐璠為左驍衛  
上將軍充西都大內皇牆使十一月壬午以中書侍郎  
平章事鄭珣權判戶部事戊子以寧州刺史周武為武  
靜軍防禦使守慶州刺史以河潼軍使竇廷琬為寧州

刺史十二月晉王自太原復至魏州庚申以左金吾衛  
大將軍充街使華溫琪為右龍虎軍統軍以右龍虎軍  
統軍張彥勳為商州刺史以前西京大內皇城使李項  
為右威衛上將軍以左金吾衛上將軍李周彝權兼左  
街使壬戌以守太尉兼中書令河南尹判六軍諸衛事  
魏王張宗奭為天下兵馬副元帥丙寅以西面行營馬  
軍都指揮使檢校太保鄭州刺史充本州防禦使王彥  
章為檢校太傅丁卯以西面行營馬步都指揮使左龍



虎軍統軍賀瓌為檢校太傅同中書門下平章事充宣

義軍節度使鄭滑濮等州觀察處置等使

通鑑云時論平慶州功故

賀瓌進秩

已巳帝幸洛陽為來年有事於南郊也遂幸伊闕

親拜宣陵時租庸使趙巖勸帝郊天且言帝王受命須行此禮願陛下力行之宰臣敬翔奏曰國家自劉鄩失律以來府藏殫竭箕斂百姓供軍不暇郊祀之禮頒行賞賚所謂取虛名而受實弊也況晉人壓境車駕未可輕動帝不聽遂行是月晉人陷楊劉城帝聞之懼遂停

郊禮車駕急歸東京

通鑑云道路訛言晉軍已入大梁扼汜水矣從官皆憂其家相顧涕泣

泣帝惶駭失圖遂罷郊祀

癸酉詔文武兩班除元隨駕人數外其餘

竝令御史司憲張袞部署候車駕離京後一兩日發赴

東京甲戌以天下兵馬副元帥太尉兼中書令河南尹

魏王張宗奭為西都留守

貞明四年春正月晉人寇鄆濮之境車駕至自洛陽庚

辰以蔡州刺史姚勅權知感化軍節度觀察留後乙酉

以前靜難軍馬步軍都指揮使黃貴為蔡州刺史甲午

以右領軍衛上將軍齊奉國為左金吾衛大將軍充衛使二月遣將謝彥章帥衆數萬迫揚劉城甲子晉王來援揚劉城彥章之軍不利而退三月壬午以前右武衛上將軍張筠為左衛上將軍癸巳以鎮國軍節度押衙充本道馬步軍都指揮使江可復為衍州刺史壬寅鎮海鎮東等軍節度行軍司馬秦州節度使檢校太傅同平章事馬綽加檢校太尉同平章事依前鎮海鎮東等軍節度行軍司馬餘如故從錢鏐之請也夏四月丁未

以宣徽院使右衛上將軍趙穀權知青州軍州事以宣徽院副使韋堅權知本院事己酉以銀青光祿大夫行中書侍郎同中書門下平章事權判戶部鄭珏為金紫光祿大夫中書侍郎兼刑部尚書平章事集賢殿大學士判戶部上柱國仍進封滎陽郡開國侯加食邑五百戶以金紫光祿大夫行尚書吏部侍郎上柱國蘭陵縣開國男食邑三百戶蕭頊為中書門下平章事仍進封蘭陵縣開國伯加食邑四百戶庚戌以前崇德軍使前

右武衛大將軍杜存為右領軍衛上將軍甲寅以刑部  
郎中充史館修撰竇專為翰林學士初學士竇夢徵草  
錢鏐麻貶蓬萊尉帝召專入翰林遣宗政使李振問宰  
相云專是宰臣蕭頃女婿令中書商量可否中書奏曰  
宰相親情不居清顯避嫌之道雖著舊規若蒙特恩亦  
有近例固不妨事帝乃可之己未靈武節度使韓洙洛  
起復授開府儀同三司依前檢校太傅同平章事癸亥  
以延州忠義軍節度使太原西面招討應接使檢校太

師兼中書令渤海王高萬興兼鄜延兩道都制置使餘如故時萬興弟鄜州節度使萬金卒故有是命己巳以開府儀同三司守司空兼門下侍郎同平章事趙光逢為司徒致仕兼加食邑五百戶以光逢累上章請老故也辛未詔宰臣敬翔權判諸道鹽鐵使務壬申以太子賓客趙光胤為吏部侍郎五月甲戌以荆南衙內馬步軍都指揮使檢校司徒高從誨領濠州刺史乙亥以特進檢校太傅前潁州團練使張實為起復雲麾將軍依

前潁州團練使庚辰以工部尚書致仕孔拯為國子祭  
酒己丑以太常少卿韋彖為右諫議大夫六月甲辰以  
金紫光祿大夫檢校司徒歙州刺史朱令德為忠武軍  
節度觀察留後己酉以權知感化軍兩使留後特進檢  
校太保姚勛為感化軍節度觀察留後庚戌上以秘書  
少監王翹為將作監以其父名祕故也丙辰以左監門  
衛將軍康贊美為商州刺史以左衛上將軍張筠為權  
知永平軍節度觀察留後兼判大安府事戊午以前景

州刺史衛審符為右衛大將軍庚申以河陽節度充北面行營排陣兩京馬軍都軍節度等使光祿大夫檢校太保謝彥章為匡國軍節度陳許蔡等州觀察處置等使以宣徽院副使韋堅權知河陽軍州事秋七月庚辰以商州刺史康贊美為起復雲麾將軍依前商州刺史辛卯以前左驍衛上將軍楊詔為右武衛上將軍戊戌以前匡國軍節度使檢校尚書左僕射羅周敬為檢校司空守殿中監駙馬都尉八月丙午以右廣勝軍使劉



君鐸為號州刺史戊申以武寧軍節度副使李存權知  
宿州事辛亥涇原節度使杜建徽加檢校太傅同平章  
事建徽吳越王錢鏐之將也逢領涇原節制至是以其  
上請加恩故有是命乙卯以蔡州刺史黃貴為絳州刺  
史辛酉以絳州刺史尹皓為感化軍節度觀察留後癸  
亥以前永平軍節度副使張正己為房州刺史乙丑以  
宿州團練使趙麓權知河陽節度觀察留後以左驍衛  
將軍劉去非為郢州刺史戊辰以權知永平軍節度觀

察留後兼判大安府事張筠為永平軍節度觀察留後  
依前兼判大安府事是月晉王率師次楊劉口遂軍于  
麻家渡北面招討使賀瓊以兵屯濮州北行臺村對壘  
百餘日晉王以輕騎來覘許州節度使謝彥章發伏兵  
掩擊圍之數重會救軍至晉王僅以身免九月丁丑靜  
勝軍節度崇裕等州觀察處置等使特進檢校太傅同  
平章事溫昭圖加檢校太尉甲午崇政院副使張希逸  
加金紫光祿大夫行秘書少監乙未起復雲麾將軍檢

校太保壽州團練使張昌孫落起復授光祿大夫檢校  
太傅冬十月辛丑朔以前感化軍節度觀察留後特進  
檢校太保姚勛為左龍虎統軍充西都內外馬步軍都  
指揮使以洛苑使金紫光祿大夫檢校司徒守左威衛  
大將軍董璋為右龍虎統軍己酉以安南靜海節度使  
檢校司徒曲美為檢校太保同平章事庚戌以商州刺  
史康贊美為蔡州刺史十一月壬辰前懷州刺史朱勛  
授起復雲魔將軍依前懷州刺史十二月庚子朔晉王

領軍迫行臺寨距寨十里結營而止北面招討使賀瓌  
殺許州節度使謝彥章濮州刺史孟審澄別將侯溫裕  
等於軍以謀判聞為行營馬步都虞候朱珪構之也晉  
王聞之喜曰彼將帥不和亡無日矣丁未以行營諸軍  
馬步都虞候光祿大夫檢校太保曹州刺史朱珪為檢  
校太傅充匡國軍節度觀察留後依前行營諸軍馬步  
都虞候癸丑詔曰行營諸軍馬步都虞候匡國軍節度  
觀察留後朱珪昨以寇戎未滅兵革方嚴所期朝夕之

間克弭烟塵之患每於將帥別注憂勞而謝彥章孟審  
澄候溫裕忽構異圖將萌逆節賴朱珪挺施貞節密運  
沈機果致梟擒免資讎敵特加異殊之命用旌忠孝之  
謀便委雄藩俾荷隆渥可檢校太傅充平盧軍節度淄  
青登萊等州觀察處置押新羅渤海兩番等使兼行營  
諸軍馬步軍副都指揮使仍進封沛國郡開國侯乙巳  
起復雲麾將軍檢校太保陳州刺史惠王友能鎮國軍  
節度陝虢等州觀察處置等使起復雲麾將軍檢校太

保邵王友誨竝落起復加檢校太傅以前房州刺史牛  
知業為右羽林軍統軍癸亥北面招討使賀瓌率大軍  
與晉人戰於胡柳陂晉人敗績是日旣晡復為晉人所  
敗初晉人起軍將襲東京乃下令軍中老弱悉歸於鄴  
是月二十二日晉王次臨濮賀瓌王彥章自行臺寨率  
軍躡之二十四日至胡柳陂晉王領軍出戰瓌軍已成  
列晉王以騎突之王彥章一軍先敗彥章走濮陽晉人  
輜重在陣西瓌領軍薄之晉人大奔自相蹈藉死者不

可勝紀晉大將周德威歿於陣璩軍乃登土山列陣於山之下晉王復領兵來戰璩軍遂敗翼日晉人攻濮陽陷之京師戒嚴

貞明五年春正月晉人城德勝夾河為柵二月乙巳以宣徽院副使韋堅權知徐州軍事三月己卯以華州感化軍留後尹皓為華州節度使加檢校太保同平章事癸未制削奪兗州節度使張守進在身官爵以其叛故也仍命劉鄩為兗州管內安撫制置使領兵以攻之夏

四月壬寅以永平軍留後兼判大安府事張筠為永平軍節度使檢校太保行大安尹庚戌以鎮海軍北面水陸都指揮使湖州刺史檢校太傅錢傳璟遙領宣州寧國軍節度使加同平章事是月賀瓌攻德勝南城以艤艫戰艦橫於河以扼津濟之路晉人斷其艤艫濟軍以援南城瓌等退軍五月己巳山南東道節度使檢校太傅孔勳加同平章事丁亥以延州節度使鄜延兩道都制置太原西面招討應接等使渤海郡王高萬興為檢



校太師兼中書令充保大忠義等軍節度鄜延管内觀察等使是月以行營諸軍左廂馬軍都指揮使鄭州防禦使王彥章為許州匡國軍節度觀察留後依前行營諸軍左廂馬軍都指揮使六月壬戌以天驕院使李隨權知登州軍州事秋七月晉王自魏州還太原八月乙未朔滑州節度使賀瓌卒輟視朝三日詔贈侍中是月命開封尹王瓚為北面行營招討使瓚乃與許州留後王彥章等率大軍自黎陽濟營於陽村造浮梁以通津

路九月丙寅制削奪廣州節度使南平王劉巖在身官  
爵以其將謀僭號故也仍詔天下兵馬元帥錢鏐指揮  
攻討冬十月晉王復至魏州是月劉鄩攻下兗州擒張  
守進夷其族十一月丁丑以兗州安撫制置使特進檢  
校太傅大彭郡開國公劉鄩為兗州節度使開府儀同  
三司檢校太尉同平章事賞平兗之功也辛卯王瓚帥  
師至戚城遇晉軍交綏而退十二月戊戌晉王領軍迫  
河南寨王瓚率師禦之獲晉將石家才既而瓚軍不利

瓚退保楊村寨晉人陷濮陽

舊五代史卷九

舊五代史卷九考證

梁末帝紀中以宣義軍節度副大使知節度事 案原  
本脫副字考新唐書百官志及五代會要副大使為  
藩鎮官爵今增入

蘓州刺史錢傳璪 傳璪原本作傳珽今據十國春秋  
改正

峯州刺史錢傳珽 案歐陽史職方志有封州而無峯  
州是書前後俱作峯州未知何據今仍其舊

以刑部員外郎封翹 翹原本訛堯今據封舜卿傳改

正

靈武節度使韓洙 韓洙原本作韓殊考是書韓遜傳洙即遜之子歐陽史雜傳亦作洙今改正

檢校尚書左僕射羅周敬 周敬原本作用敬考是書晉列傳作周敬歐陽史羅紹威傳亦作子周敬今改正

建徽吳越王錢鏐之將也 建徽原本訛作達徽今據

十國春秋改正

賀瓌殺許州節度使謝彥章 案通鑑賀瓌密譖謝彥章於帝因與朱珪伏甲以殺彥章蓋密奉帝旨也是書及歐陽史五代春秋俱以賀瓌專殺為文未知孰是

制削奪兗州節度使張守進在身官爵仍命劉鄩領兵攻之 案是書守進歸晉本紀繫於五年三月張萬進傳作四年七月劉鄩傳仍作五月蓋守進潛附於

晉在四年秋聲罪致討則五年春事也五代春秋以  
守進叛為五年事歐陽史又以劉鄩討之為四年事  
不如是書之徵實

舊五代史卷九考證



欽定四庫全書

舊五代史卷十

宋門下侍郎參知政事監修國史薛居正等撰

梁書第十

末帝紀下

貞明六年春正月戊子以曹州刺史朱漢賓為安州宣威軍節度使以許州匡國軍節度觀察留後充散指揮都軍使檢校太傅王彥章為匡國軍節度使進封開國

侯軍職如故二月癸丑宣州節度使錢傳璟起復依前  
檢校太傅同平章事宣州節度使以其丁內艱故也三  
月丁亥以前申州刺史張紹珪為大理卿夏四月丁亥  
制曰王者愛育萬方慈養百姓恨不驅之仁壽撫以淳  
和而炎黃有戰伐之師堯舜有干戈之用諒不獲已其  
猶病諸然則去害除妖興兵動衆殺黑龍而濟中土刑  
白馬而誓諸侯終能永逸暫勞以至同文同軌古今無  
異方冊具存朕以眇末之身託億兆之上四海未乂八

年於茲業業兢兢日慎一日雖踰山越海肅慎方來而  
召雨徵風蚩尤尚在顧茲殘孽勞我大邦將士久於戰  
征黎庶疲於力役木牛暫息則師人有乏饗之憂流馬  
盡行則丁壯有無聊之苦況青春告謝朱夏已臨妨我  
農時迫我戎事永言大計思致小康宜覃在宥之恩稍  
示殷憂之旨用兵之地賦役實煩不有蠲除何使存濟  
除兩京已放免外應宋毫潁鄆齊魏滑鄭濮沂密青登  
萊淄陳許均房襄鄧沁隨陝華雍晉絳懷汝商等三十

二州應欠貞明四年終已前夏秋兩稅并鄆齊滑濮襄  
晉輝等七州兼欠貞明四年已前營田課利物色等並  
委租庸使逐州據其名額數目矜放所在官吏不得淹  
停制命徵督下民致恩澤不及於鄉閭租稅虛捐於賑  
籍其有私放遠年債負生利過倍自違格條所在州縣  
不在更與徵理之限兗州城內自張守進違背朝廷結  
連蕃寇久勞攻討頗困生靈言念傷殘尋加給復應天  
下見禁罪人如犯大辟合抵極刑者宜示好生特令減

死除準格律常赦不原外徒流已下遞減一等除降官  
未經量移者與量移已量移者便與復資云庚子宗正  
卿朱守素上言請依前朝置匭院令諫議大夫專判從  
之乃以右諫議大夫鄭韜光充知匭使已以右僕射  
兼門下侍郎同平章事監修國史判度支開國公敬翔  
為弘文館大學士延資庫使諸道鹽鐵轉運等使餘如  
故以中書侍郎兼刑部尚書平章事集賢殿大學士判  
戶部事鄭珣為監修國史判度支以中書侍郎平章事

蕭頊為集賢殿大學士判戶部事以尚書左丞李琪為  
中書侍郎平章事丙午吏部侍郎趙光胤為尚書左丞  
己酉以河中護國軍節度副大使知節度事制置度支  
解縣池場等使開府儀同三司守太保兼中書令冀王  
友謙依前守太保兼中書令兼同州節度使餘如故癸  
丑鄜延節度使兼西面招討接應等使檢校太保兼中  
書令渤海郡王高萬興進封延安王賜號匡時定節功  
臣前衡州長史劉鵬進所撰地理手鏡十卷己未以租

庸判官尚書工部郎中張銳為戶部郎中充崇政院學士辛酉以前吏部侍郎盧協為禮部侍郎五月己丑故左衛上將軍齊奉國贈太傅詔曰應文武朝官或有替罷多年漂流在外者宜令中書門下量才除授勿使栖遲或有進士策名累年未釋褐者與初任一官已釋褐者依前資叙用己酉昇宋州為大都督府其餘廢大都督府額六月遣兗州節度使劉鄩華州節度使尹皓崇州節度使溫昭圖駐宅使段凝領軍攻同州先是河中

朱友謙襲陷同州節度使程全暉單騎奔京師友謙以其子令德為同州留後表求節旄不允既而帝慮友謙怨望遂命兼鎮同州制命將下而友謙已叛遣使求援於晉故命將討之九月庚寅以供奉官郎公遠充契丹歡好使晉王遣都將李嗣昭李存審王建及率師來援同州戰於城下我師敗績諸將以餘衆退保華州羅文寨冬十月陳州妖賊毋乙董乙伏誅陳州里俗之人喜習左道依浮屠氏之教自立一宗號曰上乘不食葷茹



誘化庸民搽雜淫穢宵聚晝散州縣因循遂致滋蔓時  
刺史惠王友能恃戚藩之寵動多不法故奸慝之徒望  
風影附毋<sub>レ</sub>數輩漸及千人攻掠鄉社長吏不能詰是  
歲秋其衆益盛南通淮夷朝廷累發州兵討捕反為賊  
所敗陳頴蔡三州大被其毒羣賊乃立毋<sub>レ</sub>為天子其  
餘豪首各有樹置至是發禁軍及數郡兵合勢追擊賊  
潰生擒毋<sub>レ</sub>等首領八十餘人械送闕下並斬於都市  
龍德元年春正月癸巳詔諸道入奏判官宜令御史臺

點檢合從正衙退後便於中書門下公叅辭謝如有違越具名銜聞奏應面賜章服仍令閣門使取本官狀申中書門下受勅牒後方可結入新衙甲辰以河東道行營西面應接使前靜勝軍節度崇裕等州觀察處置等使特進檢校太尉同平章事溫昭圖為匡國軍節度陳許蔡等州觀察處置等使以北面行營副招討使匡國軍節度陳許蔡等州觀察處置等使光祿大夫檢校太傅王彥章為宣義軍節度副大使知節度事鄭滑濮等

州觀察處置等使依前北面副招討使二月己未以權  
知靜勝軍節度觀察畱後前汝州防禦使華溫琪為靜  
勝軍節度觀察畱後依前檢校太傅丙寅以荆南節度使檢校太  
師兼中書令渤海郡王高季昌為守中書令依前荆南  
節度使庚午以晉州建寧軍節度觀察畱後劉玘為晉  
州節度使檢校太保壬申史館上言伏見北齊文士魏  
收著後魏書於時自魏太武之初至於北齊書不獲就  
乃大徵百官家傳刊總斟酌隨條甄舉搜訪遺亡數年

之間勒為一代典籍編在北史固非虛言臣今請明下制勅內外百官及前資士子帝戚勲家並各納家傳具述父祖事行源流及才術德業灼然可考者並纂述送史館如記得前朝會昌已後公私亦任抄錄送官皆須直書不用文藻兼以兵火之後簡牘罕存應內外臣寮曾有奏行公事關涉制置或討論沿革或章疏文詞有可採者並許編錄送納候史館修撰之日考其所上公事與中書門下文案事相符會或格言正辭詢訪不謬

者並與編載所冀忠臣名士共流家國之耿光孝子順  
孫獲記祖先之丕烈而且周德見乎殷紀舜典存乎禹  
功非唯十世可知庶成一朝大典臣叨庸委任獲領監  
修將贖素餐輒干玄覽詔從之鹽鐵轉運使敬翔奏請  
於雍州河陽徐州三處重置場院稅茶從之己卯禮部  
尚書充西都副留守兼判尚書省事崔沂奏西京都省  
凡有公事奏聞常須借印施行伏請鑄尚書省分司印  
一面從之是月鎮州大將王德明殺其帥王鎔自稱留

後遣使來求援宰臣敬翔請許之租庸使趙巖等以為不可乃止三月丁亥朔祠部員外郎李樞上言請禁天下私度僧尼及不許妄求師號紫衣如願出家受戒者皆須赴闕比試藝業施行願歸俗者一聽自便詔曰兩都左右街賜紫衣及師號僧委功德使具名聞奏今後有闕方得奏薦仍須道行精至夏臘高深方得補填每遇明聖節兩街各許官壇度七人諸道如要度僧亦仰就京官壇仍令祠部給牒今後只兩街置僧錄道錄僧

正並廢己丑以前兵部郎中杜光乂為左諫議大夫致仕壬寅改襄州鄆縣為沿夏縣亳州焦夷縣為夷父縣密州漢諸縣為膠源縣從中書舍人馬縞請也夏四月陳州刺史惠王友能反舉兵向闕帝命將出師逆擊敗之友能走保陳州詔張漢傑率兵進討勅開封府太康襄邑雍丘三縣遭陳州賊軍奔衝其夏稅只據見苗輸納五月丙戌朔制曰朕聞惟辟動天惟聖時憲故君為善則降之以福為不善則降之以災朕以眇末之身託

於王公之上不能荷先帝艱難之運所以致蒼生塗炭  
之危兵革薦興災害仍集內省厥咎蓋由朕躬故北有  
犬戎猾夏之師西有蒲同亂常之旅連年戰伐積歲轉  
輸虔劉我士民侵據我郡邑師無宿飽之饋家無擔石  
之儲而又水潦為災蟲蝗作殄戒謹作於上怨咨聞於  
下而況骨肉之內竊弄干戈畿甸之中輒為陵暴但責  
躬而罪已敢怨天以尤人蓋朕無德以事上玄無功以  
及兆庶不便於時者未能去有益於民者未能行處事



昧於酌中發令乖於至當招致災患引翼禍殃罪在朕躬不能自赦夙夜是懼寢食靡寧將勵已以息災爰布澤而從欲今以薰風方扇旭日初昇朔既視於正陽歷宜更於嘉號庶惟新之令敷華夏以同歡期克念之心與皇王而合道其貞明七年宜改為龍德元年應天下見禁罪人除大辟罪外遞減一等德音到後三日內疏理訖奏應欠貞明三年四年諸色殘欠五年六年夏稅殘稅並放侍衛親軍及諸道行營將士等第頒賜優當

已從別勅處分左降官與量移已經量移者與復資長  
流人各移近地已經移者許歸鄉里前資朝官寄寓遠  
方仰長吏津置赴闕内外文武常叅官節度使畱後刺  
史父母亡歿者並與封贈公私債負納利及一倍已上  
者不得利上生利先經陣歿將校各與追贈云以宣和  
庫使守右領衛將軍李嚴權知兗州軍州事丁亥詔曰  
郊裡大禮舊有渥恩御殿改元比無賞給今則不循舊  
例別示特恩其行營將士賞賚已給付本家宜令招討

使霍彥威副招討使王彥章陳州行營都指揮張漢傑  
曉示諸軍知委是月兗州節度使克河東道行營都招  
討使劉鄩卒六月己亥以都點檢諸司法物使檢校司  
徒行左驍衛大將軍李肅為右威衛上將軍秋七月陳  
州朱友能降唐子詔曰朕君臨四海子育兆民唯持不  
黨之心庶叶無私之運其有齒予戚屬雖深敦叙之情  
干我國經難固含弘之旨須遵常憲以示至公特進檢  
校太傅使持節陳州刺史兼御史大夫上柱國食邑三

千戶惠王友能列爵為王頒條治郡受元戎之寄任處  
千里之封疆就進官資已登崇貴時加錫賚以表優隆  
宜切知恩合思盡節撫俗當申於仁政佐時期効於忠  
規而狎彼小人納其邪說忽稱兵而向闕敢越境以殘  
民侵犯郊畿驚撓輦轂遠邇咸嫉謀畫交陳及興問罪  
之師旋驗知非之狀瀝懇繼陳於章表東身願赴於闕  
庭備述艱危覬加寬恕朕得不自為屈已姑務安仁特  
施貸法之恩蓋舉議親之律詢於事體抑有朝章止行

退責之文用塞衆多之論可降封房陵侯於戲君臣之體彼有不恭伯仲之恩予垂立愛顧茲輕典豈稱羣情凡在臣寮當體朕意甲辰制以特進檢校太傅衡王友諒可封嗣廣王冬十月北面招討使戴思遠攻德勝寨之北城晉人來援思遠敗於戚城

龍德二年春正月戴思遠率師襲魏州時晉王方鎮州故思遠乘虛以襲之陷成安思遠遂急攻德勝北晉將李存審極力拒守二月晉王以兵至思遠收軍一

退復保楊村八月段凝張朗攻衛州下之獲刺史李儒以獻戴思遠又下淇門共城新鄉等三縣自是澶之西相州之南皆為梁有晉人失軍儲三分之一焉

龍德三年春三月晉潞州節度留後李繼韜遣使以城歸順先是繼韜父嗣昭為潞州節度使戰歿於鎮州城下晉王欲以嗣昭長子繼儔襲父位繼韜在潞州即執繼儔囚之遣使來送款仍以二幼子為質澤州刺史裴約不從繼韜之謀帝命董璋為澤州刺史令將兵攻之

夏四月己巳晉王即唐帝位於魏州改天祐二十年為同光元年閏月壬寅唐軍襲鄆州陷之巡檢使陳州刺史劉遂嚴本都指揮使燕頤奔歸京師皆斬于都市五月以滑州節度使王彥章為北面行營招討使辛酉王彥章率舟師自楊村寨浮河而下斷德勝之浮梁攻南城下之殺數十人唐帝棄德勝之北城併軍保楊劉己巳王彥章段凝圍楊劉城六月乙亥唐帝引軍援楊劉潛軍至博州築壘於河東岸戊子王彥章杜晏球率

兵急攻博州之新壘不克遂退保於鄒口秋七月丁未唐帝引軍泐河而南王彥章棄鄒口復至楊劉己未自楊劉拔營退保楊村寨八月以段凝代王彥章為北面行營招討使戊子段凝營於王村引軍自高陵渡河復臨河而還董璋攻澤州下之庚寅唐帝軍於胡城先鋒將康延孝率百騎奔於唐盡洩其軍機命滑州節度使王彥章率兵屯守鄆之東境九月戊辰彥章以衆渡汶與唐軍遇於遞防鎮彥章不利退保中都冬十月辛未



朔日有食之甲戌唐帝引師襲中都王彥章兵潰於是  
彥章與監軍張漢傑及趙廷隱劉嗣彬李知節康文通  
王山興等皆為唐人所獲翼日彥章死于任城帝聞中  
都之敗唐軍長驅將至遣張漢倫馳驛召段凝於河上  
漢倫墜馬傷足復限水潦不能進時禁軍尚有四千人  
朱珪請以拒唐軍帝不從登建國門召開封尹王瓚謂  
之曰段凝未至社稷繫卿方畧瓚即驅軍民登城為備  
或勸帝西奔洛陽趙巖曰勢已如是一下此樓誰心可

保乃止俄報曰晉軍過曹州矣帝置傳國寶於卧内俄失其所在已為左右所竊迎唐帝矣帝召控鶴都將皇甫麟謂之曰吾與晉人世讎不可俟彼刀鋸卿可盡我命無令落讎人之手麟不忍帝曰卿不忍將賣我耶麟舉刀將自剄帝持之因相對大慟戊寅夕麟進刀於建國樓之廊下帝崩

五代會要末  
帝年三十六

麟即時自剄遲明唐軍

攻封丘門王瓚迎降唐帝入宮妃郭氏號泣迎拜初許州獻綠毛龜宮中造室以蓄之命曰龜堂帝嘗市珠於

市既而曰珠數足矣衆皆以為不祥之言帝末年改名

瑱字一十一十月一八日

案此句疑有脫衍蓋當時傳會者析王字為一十一析真

字為十月一八也冊府元龜作或解云瑱字一十一十月一八知此句日字因下文有日字而衍今姑仍其舊

果以一十一年至十月九日亡唐帝初入東京聞帝殂

憮然歎曰敵惠敵怨不在後嗣朕與梁主十年對壘恨

不生見其面尋詔河南尹張全義收葬之其首藏于太

社晉天福二年五月詔太社先藏唐朝罪人首級許親

屬及舊寮收葬時右衛上將軍婁繼英請之會繼英得

罪乃詔左衛上將軍安崇阮收葬焉

史臣曰末帝仁而無武明不照姦上無積德之基可尋  
下有弄權之臣為輔卒使勁敵奄至大運俄終雖天命  
之有歸亦人謀之所誤也惜哉

舊五代史卷十

舊五代史卷十考證

梁末帝紀下宣州節度使錢傳璟 宣原本訛亘今據

十國春秋改正

應宋毫潁鄆齊魏滑 案原本脫魏字今據冊府元龜

增入

充知匭使 匭原本作匱考通典唐三省官有知匭使

今改正

朱友謙襲陷同州節度使程全暉單騎奔京師 案歐

陽史本紀朱友謙殺節度使程全暉至列傳亦言全暉奔京師紀傳互異宜以是書為正

華溫琪為靜勝軍留後 案通鑑作貞明六年事與是書繫龍德元年異

鎮州大將王德明殺其帥王鎔 案五代春秋三月趙人張文禮殺其君鎔是書及通鑑作二月

夏四月陳州刺史惠王友能反 案歐陽史作三月與是書異

詔張漢傑率兵進討 漢傑原本作衡傑今據通鑑改

正

王彥章率舟師自楊村寨浮河而下 舟師原本訛州

師今據通鑑改正

帝召控鶴都將皇甫麟 案通鑑考異引莊宗實錄作

皇甫麟歐陽史從是書作麟

舊五代史卷十考證